

- स्वामित्व योजना रा तहत हाल ताई दो करोड़ पैंतीस लाख ऊं बत्ता संपत्ति कार्ड बांटी ज्या ।
- प्रदेश मांय बिजली ऊं चालण वाळी गाड़ियां ने बधावो देवण सारु 200 करोड़ रुपया रो ई-व्हीकल प्रमोशन फंड बणायी ज्यो ।
- पंडित दीनदयाल उपाध्याय री बरसी रे मौके आज प्रदेशभर मांय न्यारा-न्यारा कार्यक्रम राख्खी ज्या ।
- बीकानेर री महाजन फील्ड फायरिंग रेंज मांय भारत अर मिस्र रो भेल्लो युद्ध अभ्यास साइक्लोन जारी ।

000

देश रा एक लाख उनसठ हजार गांवां मांय स्वामित्व योजना रा तैत हाल ताई दो करोड़ पैंतीस लाख ऊं बत्ता संपत्ति कार्ड बांट दिया ज्या है । पंचायतीराज राज्य मंत्री एसपी सिंह बघेल आज लोकसभा मांय आ जाणकारी दीनी । वे कह्यो के करीब तीन लाख अठारह हजार गांवां मांय ड्रोन सर्वे रो काम पूरो व्हे ग्यो है ।

000

प्रदेश मांय बैटरी ऊं चालण वाळी गाड़ियां ने बधावो देवण सारु इलेक्ट्रिक वाहन नीति रा तहत 200 करोड़ रुपया रो ई-व्हीकल प्रमोशन फंड बणायी ज्यो है । “इलेक्ट्रिक वाहन नीति” रा तैत बैटरी ऊं चालण वाळी नुवी गाड़ियां री खरीदी करण वाळां ने स्टेट जीएसटी री रकम पाछी देवण अर एकमुश्त अनुदान ई-व्हीकल प्रमोशन फंड ऊं देवण रो प्रावधान करी ज्यो है । ई रो फायदो एक सितम्बर 2022 पाछे राजस्थान मांय खरीदी ज्यी अर राजस्थान मांय पंजीकृत करायी ज्या वाहनां रा मालिकां ने मिलेला ।

000

मालदीव री पीपल्स मजलिस रा स्पीकर अब्दुल रहीम अब्दुल्ला री अगुवाई मांय मालदीव रो एक शिष्ट मण्डल भारत रो दौरा कर रह्यो है । ओ शिष्ट मण्डल आज लोकसभा रा कामकाज री जाणकारी लीनी । लोकसभा स्पीकर ओम बिरला इण रो स्वागत कीनो । शिष्ट मण्डल श्री बिरला सागे मीटिंग ई कीनी ।

000

राजसमंद री सांसद महिमा कुमारी मेवाड़ लोकसभा मांय शून्यकाल रे दौरान ब्यावर मांय जवाहर नवोदय विद्यालय खोलण री मांग उठाई । सांसद कह्यो के प्रधानमंत्री नरेंद्र मोदी भणार्ई-लिखाई माथे खास ध्यान दे रह्या है । राजसमंद संसदीय हलका मांय ब्यावर नुवो जिलो है, जठे नवोदय विद्यालय नी व्हेवण ऊं बच्चां ने भणार्ई सारु अजमेर जिला रा नसीराबाद जावणो पड़े है ।

000

भाजपा रा प्रदेश अध्यक्ष मदन राठौड़ कह्यो है के भाजपा रो संगठनात्मक ढांचो मजबूत अर अनुशासित है । मंत्री डॉक्टर किरोड़ी लाल मीणा ने नोटिस देवण ऊं जुड़्या एक सवाल रा जवाब मांय श्री राठौड़ आज नई दिल्ली मांय कह्यो के संगठन ने किण ई मुद्दा माथे ध्यान देवण री जरूरत व्हे ,तो पार्टी जरूरी कदम उठावे है ।

राठौड़ साफ कीनो के संगठन मांय समुचित व्यवस्था बणायी राखणो घणो जरूरी है । भाजपा रा प्रदेश अध्यक्ष कह्यो के ओ मामलो पूरी तरह संगठन परिवार रो अंदरूनी मुद्दो है, जिण ने परिवार मांय ही सुलझावण री कोशिश करी जा रही है । राठौड़ ई मामला मांय मीडिया ट्रायल नी करण री अरज करता थकां कह्यो के हर सियासी संगठन मांय कुछ मुद्दा सामी आवे है, ज्यां ने संगठन रा सिद्धातां अर मूल्यां रा आधार ऊं सुलझाया जावे है ।

अर अब खबरां महाकुंभ री —

प्रयागराज महाकुंभ मांय काल माघ पूण्यू रो स्नान व्हेला। ई मौके मोटी तादाद मांय जातरूआं रे आवण री संभावना ने ध्यान राखता थकां रेलवे खास व्यवस्थावां कीनी है। रेल मंत्री अश्विनी वैष्णव प्रयागराज रेलवे स्टेशन री व्यवस्थावां रो जायजो लीनो। ई बीचे उत्तर-पश्चिम रेलवे महाकुंभ मेला स्पेशल 13 गाड़ियां चला रह्यो है। मुख्य जनसंपर्क अधिकारी शशि किरण बतायो के अ गाड़ियां उदयपुर, बाड़मेर, श्रीगंगानगर, अजमेर, जयपुर, जोधपुर अर बीकानेर ऊं चलाई जा रही है। ई बीचे राज्यपाल हरिभाऊ बागडे आज वां रा पिरवार वाळां सागे महाकुंभ मेळा रा त्रिवेणी संगम मांय डुबकी लगाई। ई मौके वे संगम स्नान सागे कुंभ ऊं जुड़ी भारत री सनातन परंपरा ने याद करता थकां कह्यो के महाकुंभ स्नान संस्कृति री जड़ां ऊं जुड़णो है। श्री बागडे कह्यो के गंगा, यमुना अर सरस्वती नदी रा संगम मांय स्नान ऊं शरीर ही नहीं बल्कि आत्मा री ई शुद्धि व्हे है।

000

नामचीन विचारक पंडित दीनदयाल उपाध्याय ने आज वां री 57वीं बरसी रे मौके सिरधाभाव सागे याद कर्या जा रह्या है। पंडित दीनदयाल उपाध्याय 1953 ऊं 1968 तांई भारतीय जनसंघ रा नेता रह्या। ई मौके जयपुर कने धानक्या मांय दीनदयाल उपाध्याय राष्ट्रीय स्मारक स्थल माथे पुष्पाजंलि अर प्रार्थना सभा राखी ज्यी। कार्यक्रम मांय मुख्यमंत्री भजनलाल शर्मा अर उप मुख्यमंत्री दीया कुमारी ई सिरकत कीनी। कार्यक्रम मांय पंडित दीनदयाल उपाध्याय स्मृति समारोह समिति रा अध्यक्ष प्रो. मोहन लाल छीपा कह्यो के पंडित दीनदयाल उपाध्याय ऊं जुड़ी ठोड़ां रो विकास कर्यो जावणो चाहिजे।

ई मौके विधानसभा अध्यक्ष वासुदेव देवनानी सिविल लाइंस रा विधायक गोपाल शर्मा सागे आंख्यां री जांच रा शिविर रो उद्घाटन कीनो। पाली मांय राखी ज्या कार्यक्रम मांय जिला रा प्रभारी अर स्वायत्त शासन मंत्री झाबर सिंह खर्रा ई सिरकत कीनी। जिला मांय पं. उपाध्याय रा सुशासन ऊं जुड़्या विचारां अर नीतियां रा बारा मांय संगोष्ठियां राखी ज्यी। सवाईमाधोपुर मांय ई पंडित उपाध्याय रा फोटो माथे फूल चढ़ा र वां ने याद करी ज्या। प्रधानमंत्री नरेंद्र मोदी सोशल मीडिया रे जरिये दिया ज्या संदेश मांय पंडित दीनदयाल उपाध्याय ने दूर री सोच वाळा विचारक बताया। वे कह्यो के समाज रा आखिरी छोर माथे बैट्या लोगां रा भला री पंडित दीनदयाल उपाध्याय री सोच मजबूत देश बणावण री प्रेरणा देवे है।

000

बीकानेर जिला री महाजन फील्ड फायरिंग रेंज मांय भारत अर मिस्र री फौजी टुकड़ियां रो भेलो अभ्यास साइक्लोन चाल रह्यो है। काल सरू व्ह्यो ओ अभ्यास 23 फरवरी 2025 तांई चालेला। अभ्यास मांय दोन्यू देशां री फौजी टुकड़ियां रा 25-25 फौजी शामिल व्हेला। पेश है एक रपट—

0000

राजस्थान माध्यमिक शिक्षा बोर्ड सीनियर सैकेंडरी परीक्षा रा कुछ पर्चा री तारीखां मांय बदलाव कीनो है। बोर्ड रा सचिव कैलाश चंद्र शर्मा बतायो के वास्तु विज्ञान अर पुरोहित्य शास्त्र री परीक्षा एक अप्रैल री बजाय चार अप्रैल ने , इतिहास , बिजनेस स्टडीज, कृषि रसायन विज्ञान अर कैमिस्ट्री री परीक्षा तीन अप्रैल री बजाए बाईस मार्च ने अर कम्प्यूटर विज्ञान अर इन्फॉर्मेटिक्स प्रैक्टिस विषयां री परीक्षा सात अप्रैल री बजाय सत्ताईस मार्च ने ली जावेला। नुवो टाइम टेबल बोर्ड री वेबसाइट माथे देख्यो जा सके है।

000

राज्य मांय आज 'सेफर इन्टरनेट डे' रे मौके भांत-भांत रा कार्यक्रमों रे जरिये जनता मांय साइबर अपराधां ऊं सावचेत रेहवण रा बारा मांय जाग जगायी ज्यी। साइबर अपराधां मांय खास तौर ऊं बैंक अर निवेश रा नाम ऊं फर्जी फोन अर फर्जी लिंक भेज र बैंक खाता ऊं गैर-कानूनी तरीका ऊं रकम निकाळबा री वारदातां शामिल है। सेफर इन्टरनेट डे' री ई साल री थीम "टूगेदर फॉर ए बैटर इन्टरनेट" राखी ज्यी। ई मौके बाड़मेर मांय ई जागरूकता कार्यशाला राखी ज्यी। कोटपूतली-बहरोड़ मांय न्यारी-न्यारी संस्थावां री ओर ऊं जागरूकता कार्यक्रम राखी ज्या। अजमेर मांय शिविर लगा र जनता ने इंटरनेट ने हिफाजत सागे जिम्मेदारी ऊं काम लेवण रा बारा मांय जाणकारी दीरीजी।

000

डीग ज़िला मांय प्रगतिशील किसानां अर कीड़ा मारण री दवाइयां बेचण वाळां ने अ दवाइयां बुद्धिमानी सागे काम लेवण री सिखावण दी जा रही है। म्हाणी खबरनवीस बतायो के ई रा तैत एन.पी.एस.एस. एप रा बारा मांय ई जाणकारी दी जा रही है।

000

केन्द्रीय संचार ब्यूरो, जोधपुर री ओर ऊं श्री छगनराज चौपासनी वाला राजकीय बालिका उच्च माध्यमिक विद्यालय जालोरी गेट मांय **“संविधान के 75 वर्ष”** अर केन्द्र सरकार कानी ऊं चलायी जा रही जनता रा भला री न्यारी-न्यारी योजनावां रा बारा मांय विचार गोष्ठी राख्यी ज्यी। स्कूल मांय **हमारा संविधान—हमारा स्वाभिमान** प्रदर्शनी लगायी ज्यी। ई मौके मौखिक प्रश्नोत्तरी होड़ ई राख्यी ज्यी। ब्यूरो री ओर ऊं कोटा मांय अलनिया री स्कूल मांय ई प्रदर्शनी लगा र सरकारी योजनावां री जाणकारी दीरीजी।

000

जैसलमेर मांय चाल रह्या मरु महोत्सव रा तीजा दिन आज ऐतिहासिक गड़ीसर तळाव कने राजस्थानी लोक संगीत सागे योग अभ्यास रो कार्यक्रम राख्यी ज्यो। इण मांय देसी-परदेसी सैलाणी ई मोटी तादाद मांय सिरकत कीनी। डेडानसर मैदान मांय सांस्कृतिक प्रस्तुतियां सागे ऊंटां ने सजावण री होड़ समेत केई सोहवणा कार्यक्रम व्हा। ई दौरान सीमा सुरक्षा बल-बी.एस.एफ. रा कैमल टैटू-शो माथे सगळा री निजरां रही। देशी अर परदेशी सैलानियां बीचे रस्साकशी री होड़ ई राख्यी ज्यी। एयरफोर्स रा जांबाजां री ओर ऊं **“एयर वॉरियर ड्रिल** रो दरसाव ई करी ज्यो।

000